

V E N D I M
Nr.121, datë 15.3.2001

PËR RREGULLAT E SIGURIMIT FIZIK TË INFORMACIONIT TË KLASIFIKUAR

Në mbështetje të nenit 100 të Kushtetutës dhe nenit 31, të ligjit nr.8457, datë 11.2.1999, “Për informacionin e klasifikuar “sekret shtetëror””, me propozimin e Kryeministrit, Këshilli i Ministrave

V E N D O S I:

1. RREGULLA TË PËRGJITHSHME

1. Me “sigurim fizik” kuptohet tërësia e masave, fizike dhe teknike, për ruajtjen e zonave, ndërtesave, dhomave dhe pajisjeve, ku ruhet dhe administrohet informacioni i klasifikuar “sekret shtetëror”.

2. “Zona sigurie” janë zonat ku mbahen ose ruhen informacionet e klasifikuara, ku hyrja i nënshtrohet një regjimi të veçantë.

3. Mjediset dhe “zonat e sigurisë” duhet të vendosen në vende sa më pak të ekspozuara nga jashtë, që të sigurojnë mbikëqyrje të vazhdueshme, ditën dhe natën. Ato përcaktohen nga drejtuesi i institucionit.

4. Institucionet shtetërore, ku prodhohet, përpunohet, shpërndahet, transmetohet dhe ruhet informacioni i klasifikuar “sekret shtetëror”, në përputhje me vëllimin e tij, kanë për detyrë të marrin masa për sigurimin e këtyre mjediseve. Këto mjedise pajisen me kasaforta e brava automatike. Zyrat dhe mjediset që ruajnë e administrojnë informacion të klasifikuar përdorin çelësa dhe dryna të veçantë nga ata të përdorimit të zakonshëm dhe vulosen me dyllë ose plasteline.

5. Mjediset për ruajtjen e informacioneve të niveleve “sekret” e “tepër sekret” rekomandohet, brenda mundësive, të mos jenë në katin e parë.

6. Dyert e dritaret e tyre përforcohen me shufra hekuri dhe në të lejohej hyrja vetëm e personave të autorizuar.

7. Vendet për asgjësimin e shkatërrimin e informacionit të klasifikuar përcaktohen nga titullari i institucionit. Këto vende i nënshtrohen të njëjtit regjim sigurimi si edhe zonat e sigurisë.

8. Në rastet kur në mjediset dhe “zonat e sigurisë” së institucionit do të ketë vizitore, ata duhen të mbahen larg këtyre zonave. Rregullat e shoqërimit të tyre, me e pa shoqërues, përcaktohen me udhëzim të titullarit të institucionit.

9. Në mjediset ku diskutohet për informacionin e klasifikuar, të niveleve “sekret” dhe “tepër sekret”, duhen të merren masa për kontrollin e tyre, për të parandaluar vendosjen apo përdorimin e mjeteve të përgjimit, regjistrimit a të filmimit.

II. PËR SIGURIMIN FIZIK

1. Zbatimi i masave të sigurimit duhet të bëhet në përputhje me nivelin e informacionit të klasifikuar, sasinë e informacionit, me numrin e personelit që njeh dhe administron këtë informacion, si dhe treguesit e nivelit të rrezikut që mund të vijë nga ekspozimi i paautorizuar i informacionit të ruajtur.

2. Masat e sigurimit fizik kanë për qëllim mbrojtjen ndaj:

- a) veprimtarisë së shërbimeve të huaja;
- b) sulmeve terroriste dhe akteve të sabotazhit;
- c) vjedhjes ose dëmtimit;
- ç) hyrjes së qëllimshme nga persona të paautorizuar;
- d) personave të paautorizuar për të hyrë në një nivel të caktuar informacioni.

3. Informacioni i klasifikuar të ruhet dhe të administrohet në zona ku publiku nuk mund të njihet me të.

4. Për ndalimin e hyrjes në mjediset ku ruhet dhe administrohet informacion i klasifikuar “sekret shtetëror”, i personave të paautorizuar është e domosdoshme që:

a) informacioni i klasifikuar “sekret shtetëror” të ruhet e të administrohet në zona të veçanta nga pjesët e tjera të objektit, ku nuk ndodhet një informacion i tillë;

b) të caktohen përreth “zonave të sigurisë” mjedise për qëllime kontrolli të personave dhe automjeteve;

c) të vendoset një regjim hyrje-daljeje, i cili të përcaktojë rregullat për të hyrë, qëndruar dhe dalë nga këto zona. I njëjti regjim të vendoset për ruajtjen e çelësave dhe të pajisjeve të tjera, që janë në funksion të “zonave të sigurisë”.

ç) të kontrollohen “zonat e sigurisë” nga personel i kualifikuar.

d) të përdoren pajisje dhe mjete të certifikuara dhe të kualifikuara, për mbrojtjen e informacionit të klasifikuar “sekret shtetëror”.

5. Informacioni i klasifikuar të ruhet në “zonat e sigurisë” nga çasti i krijimit për aq kohë sa është i klasifikuar. Me deklasifikimin e tij, ai do të ruhet si të gjithë dokumentet e tjera, të zakonshme.

6. Titullarët e institucioneve, që ruajnë e administrojnë informacion të klasifikuar, përcaktojnë dhe marrin masa për rregullat dhe procedurat e evakuimit të informacionit të klasifikuar, në rastet e gjendjes së luftës, të gjendjes së jashtëzakonshme, gjendjes së fatkeqësive natyrore dhe emergjencave të tjera civile, gjatë të cilave ky informacion mund të përvetësohet, dëmtohet, shkatërrohet a asgjësohet.

7. Institucionet shtetërore, që administrojnë informacion të klasifikuar, janë të detyruara të marrin masa për krijimin e pengesave fizike, të cilat mbikëqyren me roja ose me mjete teknike.

8. Këto pengesa fizike të jenë të tilla që:

a) të shmangin hyrjen me forcë ose në mënyrë të fshehtë të personave dhe të mjeteve të paaautorizuara;

b) të bëjnë të mundur ndarjen e mjediseve për personelin brenda institucionit dhe futjen, në zonat e sigurisë vetëm në bazë të parimit të “nevojës për t’u njohur”;

c) të zbulojnë dhe ndalojnë veprimet e personelit të pandershëm, i cili ka marrë hyrje të paaautorizuar ose përpiket të hyjë në materiale me nivel më të lartë sigurie.

9. Personeli i shërbimit në këto mjedise të ketë në çdo kohë listën e personave të autorizuar për të hyrë në zonat e sigurisë, ku ruhet dhe administrohet informacioni i klasifikuar.

10. Personeli i shërbimit të ketë edhe listën e institucioneve, të cilat duhet të thirren për çdo rast emergjent, si p.sh. shërbimet e policisë, shërbimin e zjarrfikësve, etj.

11. Personeli i shërbimit ka për detyrë shoqërimin, gjatë hyrjes, qëndrimit dhe daljes, të personave jonëpunës, të cilët kanë siguruar “certifikatë sigurie” për t’u njohur me informacionin e klasifikuar të institucionit.

III. SIGURIMI ME ROJA

1. Në mjediset ku ruhet dhe administrohet informacioni i klasifikuar është e nevojshme që, përveç masave të tjera, të merren edhe masa për sigurimin me roja fikse dhe/ose të lëvizshme, gjatë 24 orëve.

2. Rojat janë përgjegjës për ruajtjen e mjediseve dhe të zonave të sigurisë, që u janë dhënë për ruajtje.

3. Patrullat janë roja të cilët shërbejnë për sigurimin e zonave të sigurisë gjatë ditëve të pushimeve, pas orarit të punës dhe në gjendje të veçanta.

4. Rregullat dhe vendi i shërbimit të rojave dhe i patrullave përcaktohet nga autoriteti që ka në zotërim informacionin e klasifikuar.

5. Rojat dhe patrullat u nënshtrohen kontrolleve të vazhdueshme, veçantërisht pas orarit të punës dhe gjatë natës.

6. Rojat dhe patrullat duhet t’i kenë të qarta detyrat që kryejnë dhe u bëhet instruksion i vazhdueshëm për shërbimin.

7. Kur mjediset kanë nevojë për shumë vëndroja, sigurimi i tyre mund të bëhet edhe me sistem televiziv, sistem alarmi, mbikëqyrje të hyrjeve e daljeve.

8. Gjatë lëvizjes fizike të informacionit të klasifikuar brenda qytetit bëhet shoqërimi me një roje, ndërsa jashtë qytetit bëhet shoqërimi me dy roja, të armatosura.

9. Rojat kanë të drejtë të pengojnë çdo individ që lëviz në mjediset dhe zonat ku ka informacion të klasifikuar, nëse personi nuk tregon dukshëm shenjë dalluese.

IV. SIGURIMI ELEKTRONIK

1. Sigurimi elektronik ka për qëllim që, përveç masave të tjera të sigurimit, të vendosen pajisje, mjete dhe sisteme sinjalizimi e kontrolli, me qëllim marrjen e masave në rastet e ndërhyrjes nga persona të paautorizuar në mjediset e në “zonat e sigurisë”.

2. Në mjediset ku ruhet dhe administrohet informacioni i klasifikuar “tepër sekret” të merren masa që, përveç masave dhe sistemeve të tjera të mbrojtjes, të vendosen pajisje dhe sisteme të sigurimit elektronik (sisteme sinjalizimi, telekamera, etj).

3. Në rastet e defekteve të sistemit të kontrollit elektronik, duhet të jenë të përcaktuar personat përgjegjës, të cilët do të ndërhyjnë për riparimin e tyre.

V. DISPOZITA TË VEÇANTA

1. Ngarkohen ministritë dhe institucionet e tjera shtetërore për zbatimin e këtij vendimi.

Drejtuesit e këtyre institucioneve, brenda 30 ditëve nga hyrja në fuqi e këtij vendimi, detyrohen të nxjerrin udhëzim për zbatimin e këtij vendimi.

2. Ngarkohet Drejtoria e Sigurimit të Informacionit të klasifikuar për kontrollin e zbatimit të këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Ilir Meta